

潛江縣志卷之十七

知縣事劉煥纂修

知縣事史致謨續纂

人物志

忠節

孝友

隱逸

義行

忠孝傳

人亦有言三代以下之士所不足者非才也所有餘者非誠也誠有餘則愚愚則忠孝之性油然以生故能臨大節明大義矢志靡他縱剖心玉門不以爲苦又何冀夫汗簡之虛聲孫子之優卹耶雖然死制死

眾若日月麗天之未可隱也百里之內數百年之間有若而人載諸史冊亦足琅琅千古詎獨一邑之光乎作忠節傳

元

明安達爾

明安達爾字士元元統元年進士以宿州判官轉爲潛江達魯花赤至正十二年沔陽之賊逼城明安達爾率勇敢出擊擒其僞將劉萬戶進營蘆泐賊眾奄至出鬪死其家殲焉一子桂山海牙懷印綬去得免時知荆門

州事聶炳字韞夫江夏人明安達爾同年進士城陷罵賊死

明

### 佘隆佘威

佘隆吳元年任大梁指揮僉事從明高皇帝屢戰有功擢福建都指揮僉事洪武八年歿於海賜祭葬威隆弟隆無子威襲長淮指揮僉事洪武十四年征雲南陣亡賜祭葬

### 歐陽燧

潛江縣志

卷十七

人物志  
忠節傳

二

歐陽燧字見日號岫嶠舉人東昇子少負異才博通經史以歲貢士授黃州訓導遷盱眙知縣廉明有爲神奸江胥啖以暮金燧卻之密以聞之直指置胥於法遠近歡呼八角山羣盜負嵎屢拒官兵燧計獲巨魁諭以法令且給與俸錢令買耕具歸農樂業羣盜感泣立爲解散以病乞歸盱眙之人鑄像立祠以祀之癸未正月闖賊破荊郢分兵擊潛眾潰走賊追至沱川埠燧被執賊知爲紳欲降之燧曰孤城難守故隨眾至此豈能復俛首爾賊求生耶呼其妻廖氏曰母他往廖拾甄擊賊首

赴水死燧亦遇害乾隆四十一年

賜諡忠愍

事載一統志

### 朱士完

朱士完字符禹夙有文譽試輒爲諸生冠崇禎丙子舉人揭榜之頃士完夢有阜旗自西北飛來立於墓門上白書亂世忠臣四字時方清晏秘不敢傳至癸未闖賊破郢長驅至潛士完爲寇所獲知爲孝廉欲官之完不屈械送襄陽闖營路經泗港守者稍疎完嚙指灑血題其壁曰柏臺朱舉人死處遂投繯柏臺朱氏聚族所居地名也是時流寇往來焚殺村里爲墟惟此茅屋巋然

### 潛江縣志

#### 卷十七

人物志  
忠節傳

三

獨存閱數月其妻猶得拾骸骨葬之忠貞之士鬼神亦不忍終湮勘之前夢異哉乾隆四十一年 予祀忠

義祠

見一統志

### 楊自騰

楊自騰字孟昇以儒生工騎射崇禎癸未春闖賊據郢六月十日賊將陳良保同僞令趙國珍率兵守潛所過屠掠自騰率所練鄉勇迎戰於京山之喬旺口凡三晝夜深入無援猶手刃數十賊被執奮罵賊裂其口殘其體以死時子奂甫生一月後補荆門州弟子員妻張徐

俱苦節終身

游 鷺

游鷺邑南鄉民崇禎末闖獻充斤將軍左良玉奉命討賊不勝反縱兵殺掠甲申左兵至潛郊鷺與其子文琪被執鷺抗言曰將軍簪纓世胄朝廷倚爲長城不戮力勤王殄滅逆賊乃長寇流毒殘及赤子將軍何面目見先帝乎良玉怒縛鷺文琪并其幼子若孫殺之嗚乎鷺父子慷慨赴死距今五十餘年幾無能道其軼事亂離之際明大節以致命遂志曷可易覲匹夫慕義如鷺者

潛江縣志

卷十七

人物志  
忠節傳

四

焉忍聽其湮沒而不傳乎  
國朝

涂起鵬

涂起鵬字當世歲貢士授廣西平樂知縣撫字殘黎遠邇咸歸新定之邑漸致殷庶以上考列薦剡順治十年賊犯平樂孤城堅守援師不至遂陷鵬被執不屈與副使周永緒知府尹明廷同日遇害事聞順治十七年勅贈鵬廣西按察使司僉事蔭一子入監讀書予祭一壇給與造葬銀一百一十兩遣官諭祭子勗難蔭生例

得爲令痛父死事遂無意於仕幽貞處困以歿亦可謂賢矣嘉慶六年補給恩騎尉世襲罔替

見一統志

論曰忠者臣下之高行然其道不一大忠以道覆君而化之次忠以德調君而輔之下忠以是諫非而怨之周公管仲子胥其人也若夫遭世不幸肝腦膏液之弗恤非灼見於危微幾希之介未有不逡巡瞻顧而謬引明哲之句以自解免者也儒者侈談節烈或推見至隱而不病其苛或畧舉行事而尙嫌其忽亦未可與尙論也已

潛江縣志

卷十七

人物志  
孝友傳

五

孝友傳

孝者百行之首也漢元朔元年詔曰不察廉不勝任當免不舉孝不奉詔當以不敬論故污巷之人仗節循孝則朝廷敬謝而升諸朝服官蒞民有求忠於孝之義焉後取士一於制科而孝弟之行曾不得見褒於州郡豈非名實之異升降之辨哉爰自士大夫以及傭販齧齒以至壯年孝行表著者核實備錄以勵俗而立教作孝友傳

明

初言

初言字幼嘉嘉靖戊午舉人父芳性最嚴言左右盡養無不得其歡心父卒京邸訃聞言徒跣就道扶櫬歸廬墓三載繼母王氏疾躬侍湯藥寢食俱廢與異母弟同居絕無私營經淮上見水濱女屍詢之居人謂母利客金強女不從而死言曰有是哉其天地之正氣乎市棺埋葬而去未仕卒門人私謚爲文孝先生

柴浩

柴浩中港鄉人年十五父仕英病篤浩籲天割左股肉

潛江縣志

卷十七

人物志  
孝友傳

六

和粥以進父病卽愈

弘治舊志

廖安定

廖安定太平鄉人母李氏年老臥病安定沐浴焚香割

左股母食之病瘥

弘治舊志

謝復清

謝復清道隆鄉人邑廩庠生成化九年父榮病篤清徧求醫藥弗效乃於夜深秘叩天祝曰清乃父之遺體願毀身以救父祝畢割股和羹以進父病卽愈

萬曆舊志

何瓚

何瓚長樂鄉人事親能養志父病革呼瓚至不言瓚泣問曰父不言者得非爲庶母及幼弟乎父頷之父歿瓚事庶母益恭謹不衰與弟同居終身

弟名琰萬曆舊志

### 張鈞

張鈞方廂鄉人年十二割股救父明邑侯曹公珩旌表之其子文蔚亦以十二歲割股救母順治十二年里中以父子繼孝之詞聞於上兵巡吳公之紀表其閭曰孝鍾一門

### 何翰

潛江縣志

卷十七

人物志  
孝友傳

七

何翰字扶搖御史薦可季子風度曠夷自強問學事親以孝稱萬曆乙卯秋闈甫畢卽臥病武昌寓中榜發翰領鄉薦二十九名是時薦可尙任常州司理適有人自常州來浪傳常署有凶問翰知母陳夙疾未瘳疑母不祿大痛病劇旋卒是夕魂游常署母忽呼翰至款語移時聞者以爲譫或以爲嚙謂想之所結若或見之母曰兒實在側奉我湯藥爾輩何詫耶逾十數日皆母子相依狀後訃至時日頗符一時驚傳怪事翰妻方氏聞翰卒亦哀毀數日而死學使周公燝具題奉 旨旌表孝

烈

龔本源

龔本源母楊氏年八十病劇思食鴨醫云脾疾不可食源號泣叩天割左臂和糜以進母食就寢覺云我頃夢高冠袍笏大人侍從森列謂爾子孝心延爾齡三載後母病不能起醫者曰龔苦者生甘者死源乃取糞嘗之甘悲痛幾絕母卒年八十三初源父死且葬源曰牲醴之祭豈足盡人子之心嚙指血作饌以奠廬墓三年妻向氏死源甫三十餘終身不娶崇禎間里人以孝義聞

潛江縣志

卷十七

人物志  
孝友傳

八

邑侯南昌羅公萬象旌其門孫弘毅順治丁酉科舉人初授興國州學正擢婺源知縣

高如岐

高如岐字文卿文學高魁之子也讀書尙操履兄弟友愛爲鄉曲所推岐爲後於高科科產頗腴悉均之諸弟且取諸弟之瘠者自予安貧力學以所獲修脯供甘旨學使瞿公有孝不遺親產能均弟之褻邑侯王公念祖呼先生而不名蓋重之也孫明順治戊子拔貢任中牟

知縣

邱 牲

邱牲字兩生邑庠生邱志夔之子少業儒崇禎戊寅母朱氏病危牲默禱於天割股和肉食以進母食而甘病獲起邑侯羅公萬象聞而旌之賜以金帛癸未闖賊之亂母復病牲負母逃與賊遇牲以病母哀告賊爲色動但截牲耳而釋之翌日母死於背牲覓一棺盛之淺殯於土籲天痛哭兩晝夜伏地呼母不絕忽有相應聲自遠起漸至冢中聲益著牲異之啟視則母已復甦如睡初覺然牲喜更負母走出入賊營俱得倖脫

潛江縣志

卷十七

人物志  
孝友傳

九

郭 鑛

郭鑛邑庠生郭之輅第四子癸未二月闖賊破潛之輅誠諸子領家屬宜分途避倘有變勿俱陷虎口長子鋤隨父之輅母趙氏往賊獲輅將刃之鋤以身蔽且求代不得遂遇害同執者逃以聞於鑛鑛卽訣妻子往覓親骨上下百里凡枕骸浮屍內無不抱認終不能獲絕粒七日至屍盡處自沈水死其兄鉀錘亦被執繫於營罵賊而死一家蒙難唯鑛爲從容就義尤難矣哉

國朝

朱士弘

朱士弘字恢若邑庠生桂林太守之玉長子性謙謹秉禮教門以內肅如也敬事繼母初恭人如所生友愛幼弟父年八十士弘齒亦逾艾承歡養志細大無間順治甲午夏父玉寢疾士弘躬侍牀茵彌月父病革士弘號泣嘔血一慟而絕里人上其事邑侯葉公臣遇轉聞於憲司表其門曰孝思永錫

周淑元

周淑元字皆醇邑廩庠生父耆儒光祚言愨行惇擅博

潛江縣志

卷十七

人物志  
孝友傳

十

物洽聞之譽里中以端人推之淑元恂謹有家學祖母楊年六十九患目而矇淑元兒時泣禱於神願減算以復祖母明楊一夕感夢有告以汝孫童稚至孝還汝一目增壽五年之語寤而矇果開壽七十五終父光祚嘗遊秦中淑元侍母朱氏朱爲隱士默石子之孫女性恭慈頗識文義課以誦習母病癰淑元日夕哀號鄰叟張憐而重其行以女妻之長學爲文思密辭贍其伯父保寧守夢漁公最奇愛後以童子試見知於邑侯邵陽王公會學使宜興蔣公合試郡屬首拔食餼爲名諸生益

力行善事如其撫趙氏女甥哺亡弟孤兒幼女無異己  
出解橐金助貧旅歸裝皆爲人所難者康熙癸酉下第  
歸母朱年七十四忽無疾欠伸而逝淑元慟哭傾倒嘔  
血數升微言母苦苦遂卒古云死孝可勿媿己里人列  
狀請旌

### 歐陽柟

歐陽柟事親孝一日羣盜入室獲其父柟請以身代賊  
怒斷指流血父賴免後以歲貢官德興多善政

一統志

論曰嘗攷明洪武未定令人子身體髮膚受之父母

### 潛江縣志

#### 卷十七

人物志  
孝友傳

十一

小人好奇邀賞乃有割股剗心之事倘有不虞反傷  
親心自後凡有親疾務慎醫藥或情不得已亦聽爲  
之不在旌表之列大哉王言何一非臨深履薄之意  
特未可概爲不學者道也彼顛蒙之子樸茂不散痛  
親身之危篤計無所之而反以割股爲起死之方至  
誠惻怛忘其痛楚豈尙有市心於其間哉故於割股  
諸人俱存其名以表愚孝若初孝廉之廬墓養志何  
孝廉之游魂侍疾周文學之以身殉親皆足師表後  
學而邱姓之呼母再生竟奪鬼神之權事尤特異因

知禮升屋而呼三日而殮當大事者未可具文視也已

### 隱逸傳

凡物之珍天地寶之明珠產於深淵不割蛟龍不可得而探也大璞蘊於崇山不搏虎豹不可得而致也  
鄉嬛宛委之書不百舍重繭鬼神不發其秘也况鑿  
坏杜門之士豈猶夫處囊中而輕見其末者乎舊志  
高隱者流缺而不載果數百年來潛邑盡風雲之士  
與抑鴻飛冥冥弋人徒矯首層霄也惜乎前之人不

潛江縣志

卷十七

人物志  
隱逸傳

十二

可得而考矣後之君子其忍軼諸作隱逸傳

明

### 默石子

默石子明永嘉侯朱亮祖八世孫名孔昭字晦之其先  
自鍾陵徙潛少孤嗜學初應童子科獲後勁以言忤有  
司遂棄制舉業湛思經史天官輿地及服食導引之書  
罔不搜討論列而於孫吳尤精焉事母孝力田供甘旨  
瀕河築室流水遶舍嘉樹千章庭植紫薇一本八榦榦  
俱二十丈許中可置几環坐吟獻花時鬱若紫霞故名

紫霞莊旣終養遨遊四方與顧吏部涇陽高總憲景逸爲道學友著聖學正脈二卷播酋反大司馬魏養蒙出師禮聘至幕府出奇制勝功上欽賞參謀昭笑曰吾讀書識將畧行天下諳形勝貯胸中無益用助廓清耳豈爲是區區者哉嘗三出山海關著太平畧十卷間語同里黃鳳文曰吾嘗登山海關望東方有真人氣三十年後當出吾去遠矣後鳳文以崇禎癸酉舉於鄉順治間任青州郡倅其前知有如此者邑侯陳公夢琬甫下車就諮利病昭條議數千言惜軼其稿性少諧雖學道豪

潛江縣志

卷十七

人物志  
隱逸傳

十三

氣時時溢出如俗客不來無所憾主人對此長浩然獨立一世外所思千古前皆其自道語晚悟危言之難自箴曰吾今而後其默如石矣遂號默石子好著黃繒冠方幅道氅每理田事雖有鉅卿造訪稼畢乃衣冠延入出麥飯鹽藿諸公不敢不飽與邑太僕宜諸歐陽公友善歐陽公卒昭爲文哭之曰嗚乎先生敏而好學矜而不爭二百年來一人而已生平慎交嚴許可類然熹宗甲子二子爲稱七十壽觴適高景逸訃自毘陵至卽辭賓撤筵檢笥中素往還手書詩扇陳於堂拜奠哭五日

不休刻期買舟東下二子留之不可得後四年二子孟  
麟仲麟走吳越間徧求莫知所之歸經采石於逆旅壁  
間得默石子別友詩有白雲五嶽之句崇禎末有人邂  
逅匡廬之麓數語辭別又方士相傳遇默石子於洞庭  
山寺云

國朝

東岸居人

東岸居人王啟遠字公逸性孤介寡交遊視車馬榮華  
蔑如也善屬文尤工詞賦列膠庠十餘年未謁官長其

潛江縣志

卷十七

人物志  
隱逸傳

十四

父海雲布衣有孝行啟遠事親亦如之甲申寇兵掠潛  
啟遠徒步負母避竟以成疾遂不求聞達卜築洛江之  
濱號曰東岸居人宅三畝環以竹樹種橘千頭名花錯  
列每清秋霜候橘實纍纍有載酒過者嘯傲其下摘以  
佐觴啟遠飲不過三升而醉或吟或臥惟意所適嘗謂  
人曰嚼殘玉汁黨家臙肯相易耶歲以賣花鬻文之直  
贍其妻子有餽遺悉拒之一日晨起書於几曰浩氣歸  
虛無悠然脫世情寸心對上帝清苦一平生趺坐而逝  
所著有治懷草橘園後半百詩棄草拾錄素榮軒雜著

袁贅菴奕譜

塞翁

塞翁系出安成劉氏翁高祖贈君巨秀徙居潛江生翁曾祖孝廉勲官運同勲有子三仲曰垓進士歷任提學僉事以理學名是爲翁祖明經南金僉事之子司寇若金之弟性狷介不伍於俗時人有於陵仲子之目實爲翁所自出翁少卽厭棄紈繻知世將變亂學制科不成遂有稼圃終焉之意崇禎癸未甲申間司寇奉特召督撫閩廣遣人迎翁攜家同處海濱以恩蔭相屬翁拂然

潛江縣志

卷十七

人物志  
隱逸傳

十五

曰習見臺閣故事雖有黃瓊李固自甘恬退守節豈少季札子臧獨奈何受任子封乎因自號曰塞翁其堅德固性困益甚而守益貞可謂難矣所居常屢遷喜與人飲興至輒吟詩吟成隨手棄去不以示人工寫生其所作竹樹花鳥酒闌歌罷微酣落筆尺蹠便面筆墨飛動狂呼大叫淋漓滿志得者爭以爲寶或貽書致幣鄭重請乞摩抄縮瑟經時不肯就一紙四方賢公卿造廬就見者無虛日翁唯引分自謝以是逃名而名愈盛年七十一卒翁名泌如字鄴侯子效曾歲貢士初授咸寧教

論補穀城教諭以卓異擢懷寧知縣介特有爲能不媿其家學焉孫先歲貢士燦太學生

論曰潛德幽光詎以要譽篤實其尙焉出處生人大端依世則廢道違俗則危殆浮沈進退工持祿保位之術者固勿論已用之無致主安民之學舍之鮮潔身範俗之操習爲貌言詭行侈談高尚盜虛聲以文其媵鄙挾一技一能翱游大人之門輒自詡曰隱士亂德之徒尤君子所惡焉易曰遯世不見知而勿悶樂則行之憂則違之確乎其不可拔如是其人者而後可以隱逸稱之默石子東岸居人塞翁而外寧易遘止乎

### 義行傳

行己忠厚之風邈以義俠傳者代不數見其輕利好名敦古處以勸薄俗豔稱人口者昔人有銀管之述焉作義行傳

明

### 李本洪

李本洪天性淳樸以躬穡治產遂稱素封弘治間檄監

繕學宮估約而費鉅洪斥緡助官無恹容構椿楸大木  
爲東西二梁有嘲之者洪曰焉知吾子孫之不見庇於  
先聖也正德初郡大饑部使畢公議賑洪捐助倍人劄  
授七品散秩洪家殖而喜施賑艱給困活人尅莩邑中  
無大小呼爲恩爹蓋感之也厥後子鑾貢士孫崇信舉  
人曾孫鳴鄉魁元孫之皞會魁暨貺世兌皆以禮記魁  
於鄉科名奕葉信厚德之徵云

朱希顏

朱希顏字少南天啟丙寅歲大饑希顏首倡捐賑邑侯  
潛江縣志 卷十七 義人物志 十七  
蓬萊陳公旌其門曰尙義濟民崇禎庚辰歲又饑邑侯  
南昌羅公勸賑希顏捐倍於眾羅公題額有名行冠邑  
之褒子登鳳好施予有父風孫國柱太學生

郭 鈇

郭鈇字元銘慶遠太守之幹子以恩貢任兗州通判致  
仕崇禎癸酉歲大侵饑殫徧野鈇首出粟賑貸相率者  
眾邑有起色尤好恢廓祠廟修治橋約施堅櫓給人以  
粒温人以續貧者德之年六十卒

國朝

朱 紱

朱紱字方來邑庠生氣宇恢直好立名樂稱人善有大興除雖忤有司禍身破產弗卹也河北楊林外九坑土田窪下差徭繁重連苦巨浸人民死徙紱披陳災荒疾苦請定折畝減租之案條陳賦役志至今德之族中困於里排有兄弟鬻身者紱捐銀八十兩贖還有子姪轉徙他方流離失所者紱曲爲招至以近村田廬安處之晚喜與人譚孝友忠厚之言鄉閭多所感化年七十三卒子學素歲貢教諭學洛歲貢訓導仕任太學生州同學閩

潛江縣志

卷十七

人物志  
義行傳

十八

歲貢訓導孫有芊太學生